

## Die Gsalzene

Gueten Oobe liebi Geschtinne und Gescht  
Zer Begriessig gendere mir «at it's bescht»  
Vo unsrem Fanclub sinn mit uns zum Uffdritt doo  
Au Mitglieder und Ooni-Gliederinne koo  
Wenn Schnitzelbänggler – Schreegstrich – -inne Pointe streue  
Duet das Zueschauer - Unterstrich – -inne erfreue  
Iir als Bsuecher – Stäärnli – -inne sitzed doo  
Händ vo Servierseen und -deechtre z'dringge bikoo  
Da Väars do – däa isch wirgligg guet und rächt  
Aber s'gitt halt doch no 70 andri Gschlächt!  
Fir e Begriessig wird me drumm - und das kennt schluuche  
Ganz grob gschetzt e gueti Viertelstund vrbruuche  
Fir d'Sexualkund in de Schuele bruuchts denn rund  
Wäärend 2 Joor ebbe 16 Wuchestund  
Fir uns isch eebefalls e neis Brobleem entstande  
Kyrzligg sinn mir vor 6 verschiedne WC gstande  
Wo mir yyne sottet? Mir sinn nit druff koo  
Und hänn's am Schluss aifach in d'Hose laufe loo!

D'Queen isch im Himmel und mir mien uns jetzt draa gweene  
Am 6. Mai dien si dr Charles dr Dritti kreene  
Expäarte dien bezygligg Groone jetz erwääge  
Linggs und rächts e Stigg fir d'Oore usezsääge!

Dr Grossi Root het fyr Beamti – mir hänn's gnosse  
D' 38-Arbets-Stunde Wuche bschlosse  
Was die Bolitigger ganz offebaar nid raffe  
Jetzt mien die arme Sieche dopplet so vyyl schaffel!

Mir sinn erschyytteret, betroffe und entsetzt  
Behördewillkür – unsri Grundrächt sinn verletzt!  
Mir sinn die ainzige in Basel – s'isch abstruus  
Ooni aigni Baustell diräggt vor em Huus!

Mir wurde liebend gärn e Maa firs Lääbe finde  
Aber hytt wott sich jo kuum me aine binde  
Nämmet's easy, ooni Stress: e Tipp firs Lääbe  
Suechet Klimaschytzer – die dyen seer guet glääbe!

Raubyyberfall in Basel – mir sin ganz nooch draa  
Und lyytte unverzigglig s'117 aa  
D'Yyysatzzentraale nimmt grad ab - es dieg 'ne laid  
Dr Tesla syygi am ufflaade - nid bereit  
Si kennte ender koo und Laadezyt yyspaare  
Denn miesste Si halt ooni Blauliecht aanefaare  
Ganz nätt vo uns wäär – ooni uns do welle zwinge  
Wenn mir d'Räiber schnäll in Wooghof kennte bringe  
Falls mir grad uss andre Grynd im Zyytdrugg wääre  
Wärs au dänggbar dääne kurz dr Wääg z'erklääre  
Falls es sproochlig schwiirig wär, dr Wäg z'verzelle  
Kennte mir doch au en Uber für si bstelle  
Alternativ kennte die Gängschter s'Drämmli nää  
Ob's uns denn meeglig wär, Minz für e Byyljee z'gää  
Mir hänn denn gsait si miesse wiirgglig nid bresiere  
Das syge Klimaschytzer, die wurd's nid geniere  
Si wurde seer gärn Tesla faare – das sig s'Bescht  
Und inzwiische glääbe si am Schalter fescht!

Dr Ueli Muurer wärde mir niemools vrgässe  
Si legendäre Fäärnseeuffdritt –dä hett gsässe:  
"Hello CNN - do you me understand?  
My Name is Ueli Muurer – Chief of Switzerland  
I can say nothing to the questions you do stelle  
Because I can in English not a word vrzelle  
I speak a secret language – you must that kapiere  
That can not emol your Gheimdienschdt dechiffriere!"

### Monschterväars

Mir Gsalzene sin irritiert  
Dr Wildi Weschte erodiert  
D'Problem vo hit – mir sin am truure  
Mache us Helde Witzfyguure

In Tombstone wilde Bulvergnall  
Bandite bim Banggyyberfall  
Dr Sheriff fäält in däm Momänt  
Är schafft nur no 60 Brozänt!

McKinsey duet sich nid geniere  
Dr Wildi Weschte z'optimiere  
Drum sinn vo de Glorryche Siibe  
Numme no drey yybrig blyybe

Dr Lucky Luke – mir sin entsetzt  
Hett me in Ruestand vrsetzt  
Är aigni sich nid – ziet vill z'schnäll  
Fir e Jobsharing-Modäll

Dr Winnetou – närvligg am Änd  
Said zue sim Frind Old Shatterhand:  
«Mir dien – es duet mi rächt geniere  
Kultuuraaeignig braggdiziere!»

Yych weiss es isch seer schwäär z'erdraage  
Mir kenne au nimm Biiffel jaage  
Dr Grund dä kann ich Dir erglääre  
Yych due mi jetz vegan ernääre!

Und yych sag dr: Zimmligg glyy  
Ryyte mir nimm durch d'Prärie  
Daatsächlich hänn unseri Pfäärd  
Usserscht schlächti Abgaswäärt

Vo dr Määne bis zum Schwanz  
E myysi CO2-Bilanz  
Drumm steen in unsrem Reservat  
Elektrotrotinett baarat

Und im Rossstall – s'isch zem kotze  
Dien d'Gäul vo dääne Helde motze:  
«Miir schwinge fyr Eych nimme d'Huefe  
Dien uns uff's Dierschutzgsetz beruefe!»

Und drumm gschetzte Shatterhand  
Isch unsri Partnerschaft am Änd  
Yych mues – und bi e bitz e Beese  
D'Bluetsbruederschaft mit Dir uffleese.»

Dr Shatterhand said: «Ganz genau  
Yych fyyt mi neyerdings als Frau  
Und somit wäär ich halt sit geschter  
Sowiiso dini Bluetsschweschter»

Die Situation kennt eskaliere  
Wie sotti d'Schwyz druff reagiere?  
S'gitt nur ai Wäg us däre Noot  
Die Gsalzene in Bundesroot!